



VINNUEFTIRLIT RÍKISINS

Ákvörðun nr. 5/2013

Álagning dagsekta á Reynir bakara ehf. vegna vanrækslu á að fara eftir fyrirmælum Vinnueftirlits ríkisins

I.

Málavextir

Í reglubundinni skoðun eftirlitsmanns Vinnueftirlits ríkisins til höfuðstöðva Reynis bakara ehf., kt. 701195-3029 að Dalvegi 4, 200 Kópavogi þann 30. maí 2011, var fyrirtækinu veitt eftirfarandi fyrirmæli:

- Að setja skyldi upp neyðarbjöllu í tveim frystiklefum.
- Að setja skyldi upp vélræna loftræstingu á salernum sem eru í gluggalausum rými.
- Að fyrirtækið skyldi tilnefna öryggisvörð og starfsmenn kjósa sér öryggistrúnaðarmann og tilkynna Vinnueftirliti ríkisins hverjir voru tilnefndir/kosnir.
- Að tryggja að öryggisvörður og öryggistrúnaðarmaður sækji námskeið um aðbúnað, hollustuhætti og öryggi á vinnustöðum.
- Að gera skyldi skriflega áætlun um öryggi og heilbrigði á vinnustað.

Voru fyrirmælin gefin á grundvelli 14 gr. reglugerðar nr. 12/1965 um öryggisráðstafanir við frystikerfi og búnað í frystihúsum, Staðalsins IST EN 378-1:2008 um kælikerfi og varmadælur (viðauki D), 3. mgr. 24. gr. reglan nr. 581/1995 um húsnæði vinnustaða og 5. gr., 14. gr., 21. gr., 24. gr. og 26. gr. reglugerðar nr. 920/2006 um skipulag og framkvæmd vinnuverndarstarfs á vinnustöðum. Í ofangreindri ákvörðun Vinnueftirlits ríkisins kom fram að fyrirtækið skyldi tilkynna Vinnueftirliti ríkisins um það þegar úrbótum væri lokið.

Í reglubundinni skoðun eftirlitsmanns Vinnueftirlits ríkisins til starfstöðvar Reynis bakara ehf., kt. 701195-3029 að Hamraborg 14, 200 Kópavogi þann 30. maí 2011, var fyrirtækinu veitt eftirfarandi fyrirmæli:

- Að koma skyldi upp læstum munahólfum fyrir hvern og einn starfsmann.
- Að yfirfara skyldi sjúkrakassa.
- Að setja skyldi upp vélræna loftræstingu á salernum sem eru í gluggalausum rými.
- Að yfirfara skyldi slökkvitæki.

- Að hafa skyldi fyrirbyggjandi öryggisblöð í 16 liðum á íslensku vegna varúðarmerktra efnavara.
- Að gera skyldi skriflega áætlun um öryggi og heilbrigði á vinnustað.

Voru fyrirmælin gefin á grundvelli 7. mgr. 3. gr., 6. mgr. 19. gr., 3. mgr. 24. gr. og 6. mgr. 38. gr. reglna nr. 581/1995 um húsnæði vinnustaða, 2-3. mgr. 10. gr., reglugerðar nr. 553/2004 um verndun starfsmanna gegn hættu á heilutjóni af völdum efna á vinnustöðum, með síðari breytingum og 21. gr. og 26. gr. reglugerðar nr. 920/2006 um skipulag og framkvæmd vinnuverndarstarfs á vinnustöðum. Í ofangreindri ákvörðun Vinnueftirlits ríkisins kom fram að fyrirtækið skyldi tilkynna Vinnueftirliti ríkisins um það þegar úrbótum væri lokið.

Fyrirmælin úr báðum ofangreindum skoðunum Vinnueftirlits ríkisins voru ítrekuð tvisvar sinnum með bréfum sem stofnunin sendi Reyni bakara ehf., dags. 18. apríl 2012 og 30. ágúst 2012. Þrátt fyrir þessar ítrekanir þá var ekki farið eftir fyrirmælum Vinnueftirlits ríkisins og engar tilkynningar um úrbætur bárust stofnuninni.

Með bréfi dags. 2. maí 2013 var athygli vakin á rétti aðila skv. 13. gr. stjórnarsýslulaga nr. 37/1993 að tjá sig um efni máls áður en ákvörðun yrði tekin í því. Kom fram í bréfinu að Vinnueftirlit ríkisins væri að íhuga að leggja dagsektir á fyrirtækið þar sem það hafði ekki farið að ofangreindum fyrirmælum stofnunarinnar. Reyni bakara ehf. var veitt 14 daga frestur til að koma að andmælum áður en Vinnueftirlit ríkisins tæki ákvörðun um hvort leggja skyldi á fyrirtækið dagsektir, sbr. heimild í 87. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum. Engin svör bárust stofnuninni.

II. Niðurstaða

Skv. 1. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum er það tilgangur laganna að tryggja öruggt og heilsusamlegt starfsumhverfi. Skv. 75. gr. laga nr. 46/1980 er það hlutverk Vinnueftirlits ríkisins að hafa eftirlit með lögnum. Í lögum um aðbúnað, hollustuhætti og öryggi á vinnustöðum erum mörg almenn efnisákvæði er kveða á um hvernig vinnuumhverfi starfsmanna skuli háttað og í reglum og reglugerðum sem settar hafa verið á grundvelli þeirra eru ákvæði laganna nánar útfært.

Skv. 13. gr. laga nr. 46/1980 er það skylda atvinnurekanda að tryggja að gætt sé fyllsta öryggis og góðs aðbúnaðar og hollustuhátta á vinnustað. Skv. 37. gr., 42. gr. og 46. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum, skal fylgja fyrirmælum Vinnueftirlits ríkisins að því er varðar aðbúnað, hollustuhætti og öryggi á vinnustöðum. Þar sem Reynir bakari ehf. hefur ekki farið að ofangreindum fyrirmælum Vinnueftirlits ríkisins þrátt fyrir að fyrirmælin hafi verið ítrekuð þá hefur stofnunin tekið þá ákvörðun að leggja á fyrirtækið dagsektir, sbr. heimild í 87. gr. laga nr. 46/1980 þangað til fyrirtækið uppfyllir lagaskyldur sínar, en sú grein kveður á um það, að ef ákvæði laga nr. 46/1980 eða reglna sem settar eru með stoð í þeim eru brotin og ekki er farið eftir ákvörðun Vinnueftirlits ríkisins á grundvelli þeirra þá getur stofnunin ákveðið að sá eða þeir sem ákvörðun beinist að greiði dagsektir þar til farið verður að henni.

Skv. gögnum Vinnueftirlits ríkisins þá starfa 27 starfsmenn hjá Reyni bakara ehf. en fyrirtækið rekur brauð- og kökugerð og verslunarrekstur.

III. Ákvörðunarorð

„Reynir bakari ehf., kt. 701195-3029, hefur brotið gegn 14 gr. reglugerðar nr. 12/1965 um öryggisráðstafanir við frystikerfi og búnað í frystihúsum, Staðlinum IST EN 378-1:2008 um kælikerfi og varmadælur, 2-3. mgr. 10. gr. reglugerðar nr. 553/2004 um verndun starfsmanna gegn hættu á heilsutjóni af völdum efna á vinnustöðum, með síðari breytingum, 5. gr., 14. gr., 21. gr., 24. gr. og 26. gr. reglugerðar nr. 920/2006 um skipulag og framkvæmd vinnuverndarstarfs á vinnustöðum og 7. mgr. 3. gr., 6. mgr. 19. gr., 3. mgr. 24. gr. og 6. mgr. 38. gr. reglna nr. 581/1995 um húsnæði vinnustaða.

Af þeim sökum og með heimild í 87. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum, leggur Vinnueftirlit ríkisins dagsektir á Reyni bakara ehf. Skal fyrirtækið greiða kr. 45.000 á dag frá og með næsta degi eftir að fyrirtækinu var tilkynnt sannanlega um þennan úrskurð og þar til fyrirtækið hefur tilkynnt um úrbætur til Vinnueftirlits ríkisins í samræmi við ákvarðanir stofnunarinnar frá 30. maí 2011.”

Vinnueftirlit ríkisins

Björn Þór Rögnvaldsson